

**Rosmah Saran POLTERA Guna Pengalaman Bantu Masyarakat Setempat
Bernama
30 Mac, 2012**

KUALA LUMPUR, 30 Mac (Bernama) -- Isteri Perdana Menteri Datin Seri Rosmah Mansor menyarankan agar Persatuan Kebajikan Keluarga Bekas Polis dan Tentera (POLTERA) menggunakan pengalaman untuk berbakti kepada masyarakat setempat.

Katanya selain itu anggota POLTERA juga boleh menjadi 'mata dan telinga' kepada polis dalam menjaga ketenteraman awam dan mencegah jenayah.

"...POLTERA juga boleh mengepalai program-program sampingan seperti 'neighbourhood community watch' ataupun Rukun Tetangga mahupun penganjuran forum pencegahan jenayah untuk berkongsi pengalaman mereka dengan masyarakat," katanya berucap pada Majlis Makan Malam 1Malaysia 1 POLTERA, di sini.

Hadir sama Pengerusi POLTERA Rasul Yunus, Penasihat POLTERA Datuk Seri Dr Erwan Tahir, Pengerusi Persatuan Isteri Polis Diraja Malaysia (PERKEP) Puan Sri Suriati Md Sobri dan Ketua Pegawai Eksekutif Plus Berhad Datuk Noorizah Abdul Hamid.

Pada majlis itu Rosmah turut menyampaikan sumbangan RM3,000 bagi pihak POLTERA kepada PERKEP serta 10 kerusi roda kepada anggota POLTERA yang memerlukan.

Sementara itu, Rasul berkata persatuan tersebut akan memberi sumbangan RM1,000 kepada setiap keluarga bekas polis dan tentera yang memerlukan di seluruh negara bermula 1 April ini.

Katanya sumbangan itu akan diberi secara berperingkat yang mana POLTERA akan memilih empat keluarga setiap bulan untuk menerima sumbangan tersebut.

"Kami akan memulakannya di Wilayah Persekutuan Kuala Lumpur sebelum melangkah ke setiap negeri, jadi setiap bulan kami akan memperuntukkan sebanyak RM4,000 untuk bantuan tersebut," katanya kepada pemberita.

Selain itu, POLTERA turut memperkenalkan kad keanggotaan 1Malaysia 1 POLTERA dengan usahasama Touch N Go yang akan diberikan kepada individu yang menyumbang kepada aktiviti anjuran persatuan.

---BERNAMA

Hakcipta © 2012 BERNAMA

Source: <http://www.bernama.com/bernama/v6/bm/newsindex.php?id=656069>